

Ilinniartfinni ingerlaqqiffiusuni soraarummeerneq censoreqartarnerlu pillugit Namminersorlutik Oqartussat nalunaarutaat

Qaffasinnerusumik ilinniartitaanerit pillugit Inatsisartut inatsisaanni nr. 14, 12. juni 2019-imeersumi, Inatsisartut inatsisaatigut nr. 15, 1. december 2021-meersukkut allanngortinneqartumi §§ 17 a, imm. 3, 17, imm. 5 aamma 39, imm. 3 naapertorlugit aalajangersarneqarput:

Kapitali 1

Soraarummeerneq misilitsinnerlu

Soraarummeernermi siunertaq

§ 1. Ilinniartoq ilinniartitsissutigineqartuni anguniagassanik, ilinniakkami ilinniartitsissutitut aalajangersarneqarsimasuni imaluunniit ilinniakkap aaqqissugaanerani ilinniartitsissutigineqartuni immikkoortuni qanoq angusaqarsimatigineranik naliliinissaq misilitsittarnerni siunertaavoq. Inaarutaasumik misilitsinneq soraarummeersimanermut uppersaammik tunniussinnermut tunngaviusarpoq, § 30 tak.

Ilinniakkap aaqqissuunneqarneranut piumasaqaatit

§ 2. Ilinniakkat ataasiakkaarlugit aaqqissugaaneranni uku aalajangersarneqassapput:

- 1) Anguniakkat aammalu ilinniartitsissutini ataasiakkaani ilinniartitsissutilluunniit ilaani, inaarutaasumik misilitsiffiusuni anguniakkani angusarisanik nalilersuinnermut piumasaqaatit erseqqissumik nassuiarneqassapput.
- 2) Misilitseriaatsit, ilinniartitsinnermi peqataasarneq suliaassanullu akissutiniq tunniussisarneq il.il. pillugit malittarisassat, § 3, imm. 2 tak.
- 3) Misilitsiqataanissamut uppersaatinullu tunngatillugu ilinniartitsinnermi peqataanissamut piumasaqaateqassappat, misilitsissinnaanissamut suliaassanut allattariarsorluni akissutiniq tunniussinissamut aamma oqaluttariarsorluni saqqummiinissamut il.il. piumasaqaateqassappat aamma allattariarsorluni suliaassamik nalilersuisoqartinnagu oqaluttariarsorluni illersuinissamut piumasaqaateqassappat, taakku pillugit malittarisassat, § 3, imm. 3 tak.
- 4) Ilinniartitsinnerup ingerlanerani suliaassanut allattariarsorluni akissuteqaatit oqaluttariarsorlunilu saqqummiinnerit il.il. nalilerneqarnerat ilinniartitsissummi imaluunniit ilinniartitsissutip ilaani inaarutaasumik misilitsinnermi karakteriliinnermi ilinniartitsissummilu ilaatinneqassappata inaarutaasumillu misilitsinnermi peqataanissamut piumasaqaateqarpat, taakku pillugit malittarisassat, § 3, imm. 4 tak.

- 5) Ilinniartut ataasiakkaarlutik eqimattanngorlutilluunniit misilitsinnissaannik malittarisassat, tassunga ilanngullugu eqimattanngorluni misilitsinnermi amerlanerpaamik qanoq amerlatigisut peqataasinnaaneranik malittarisassat aamma ilinniartoq kisimiilluni misilitsinnissaminik toqqaasinnaaneranik periarfissaqarnerseq, § 4, imm. 1 tak., aamma ataasiakkaarluni suliassanut allattariarsorluni akissuteqaateqartoqassanersseq pillugit malittarisassat, § 4, imm. 3 tak. 6) Ilinniartut arlallit ataatsimoorussamik bachelorinnngorniartutik suliaqarnerannut, kandidatinnngorniartutik specialiornerannut masterinnngorniartutik suliaqarnerannut malittarisassat, § 5, imm. 2 tak. 7) Suliassap oqaloqatigiinnermi tunngaviunissaanut malittarisassat, § 5, imm. 3 tak. 8) Misilitsinnermi computerimik atuisoqassappat aamma ikiututik allanik internetimillu atuisoqassappat, taakkua pillugit malittarisassat, § 11 tak. 9) Misilitsiqqinnermi nalilersueriaatsit il.il. aamma ilinniartoq ilinniartitsissummi ilinniartitsissutaajunnaarsimasumi kingusinnerpaamik qaqugukkut pingajussaaniq misilitsissanersseq pillugit malittarisassat, § 17, imm. 6 aamma 7 tak. 10) Ilinniakkami ingerlaannarsinnaanissamut ilinniakkamik ingerlatsinissamut piumasaqaateqarpat aamma ilinniartoq ilinniartut nammineq kajumissutsimik kattuffianni siulersuisunut ilaasortaappat, ilinniakkamik ingerlatsisuunissamut piumasaqaammik saneqqutsisinnaanermut malittarisassat, § 19, imm. 1 aamma 2. 11) Misilitsinnerit sorliit ilinniartup avataaniinnerisut pillugit malittarisassat, § 22, imm. 1 tak. 12) Suliffimmi misiliinermik ilinniartuullu avataani ilisimatusarnernik nalilersuinnermut malittarisassat, § 22, imm. 6 tak. 13) Misilitsinnermi sorluni karakteriliisoqartarnerseq misilitsinnerluni sorluni »Angusivoq« imaluunniit »Angusinnigilaq« atorlugit naliliisoqartarnerseq pillugit malittarisassat, § 26, imm. 1 tak. 14) Ilinniartup allattariarsornikkut oqaasertalersuisarnikkullu piginnaasai misilitsilluni saqqummiinnerup nalilersorneranut tamarmiusumut qanoq ilaatinneqartarnera pillugu malittarisassat, § 27, imm. 1 tak. 15) Eqikkaaneq nalilersuinnermut qanoq ilaatinneqartarnera aamma eqikkaaneq oqaatsit sorliit atorlugit allanneqarsinnaanersseq allanneqassanersorlu pillugit malittarisassat, § 27, imm. 2 tak. 16) Suliassanik akissarsiaasartallinnik nalunaaruteqartarnermut allannngortitsisarnermullu malittarisassat, § 28, imm. 1 tak.

Misilitseriaatsit misilitsinnerillu aaqqissuunneqartarnerat

§ 3. Piginnaasat ilinniakkatigut pissarsiarineqarsimasut misilitsinnikkut, tassunga ilanngullugu suliaq annertuup specialillu nalilerneqarnerisigut uppersarsarneqassapput.

Imm. 2. Ilinniagaq misilitseriaatsinik assigiinngitsunik, ilinniartitsissutigineqartut imarisaannik ilinniartitsissutigineqartumilu suleriaatsinik ersersitsisunik imaqassaaq. Misilitseriaatsimi ilinniartitsissutigineqartut ataasiakkaat imaluunniit ilinniartitsissutigineqartuni immikkoortuni siunertarineqartut aallaavigineqassapput aammalu assersuutigalugu oqaluttariarsorluni, allattariarsorluni, suliffimmi misiliilluni, suliamik annertuumik suliaqarluni kiisalu misilitseriaatsit taakkua assigiinngitsut ataatsimoorlutillugit misilitsittoqarsinnaavoq. Ilinniartup ilinniartitsissummi imaluunniit ilinniartitsissutit ilaani misilitseriaasissaq imaluunniit misilitseriaasissat ilinniakkap aaqqissugaanerani aalajangersassavai.

Imm. 3. Ilinniartit ilinniakkap aaqqissugaanerani malittarisassat ukua aalajangersarsinnaavaat:

- 1) Ilinniartitsissut imaluunniit ilinniartitsissutit ilaa, imarisatigut suleriaatsitigullu tunngavissaqarpat ilinniartitsinnermi peqataanissamut piumasaqaatitigut tamakkiisumik ilaannakortumilluunniit taamaallaat uppersarsarneqarsinnaasut.

- 2) Ilinniartup ilinniartitsissummi imaluunniit ilinniartitsissutip ilaani misilitsissinnaanissaanut ilinniartitsinermi peqataanissaa piumasaqaataassasoq.
- 3) Ilinniartitsinerup ingerlanerani ilinniartup ilinniartitsissummi imaluunniit ilinniartitsissutip ilaani misilitsissinnaanissaanut suliassamut allattariarsorluni akissuteqaasiornissaa oqaluttariarsorlunilu saqqummiinissaa piumasaqaataassasut.
- 4) Suliassamut allattariarsorluni akissuteqaasiornermik naliliisoqartinnagu akissuteqaat oqaluttariarsorluni illersorneqassasoq. Suliassamut akissuteqaatip oqaluttariarsorlunilu saqqummiinerup ataatsimut nalilersornerat tunngavigalugu naliliisoqassaaq.

Imm. 4. Ilinniartit ilinniartitsinerup ingerlanerani suliassamut allattariarsorluni akissuteqaatit oqaluttariarsorlunilu saqqummiinerit il.il. nalilerneqarnerat ilinniartitsissummi imaluunniit ilinniartitsissutip ilaani inaarutaasumik misilitsinnermi karakteriliinermi ilaatinneqassanersut ilinniakkap aaqqissuussaanerani malittarisassatut aamma aalajangersarsinnaavaat. Malittarisassaqaassappat malittarisassani allassimassaaq suliassamut allattariarsorluni akissuteqaatit oqaluttariarsorlunilu saqqummiinerit il.il. nalilerneqarnerat ilinniartitsissummik imaluunniit ilinniartitsissutip ilaani ataatsimut naliliinermi qanoq ilaatinneqarnerat. Ilinniartup ilinniartitsinerup ingerlanerani suliassamut allattariarsorluni akissuteqaatit oqaluttariarsorlunilu saqqummiinerit il.il. angusiffigisimanngikkunigit ilinniartuq inaarutaasumik misilitsissinnaangitsoq ilinniartup aalajangersinnaavaa.

§ 4. Ilinniartitsissutit eqqarsaatigalugit ilinniartup ilinniakkap aaqqissugaanerani aalajangissavaa misilitsinnermi inuttut ataasiakkaatut imaluunniit eqimattakkaatut pisussatut aaqqissuunneqassanersooq. Misilitsinnermi eqimattakkaatut pisussatut aaqqissuunneqarpat ilinniartup ilutigalugu ilinniakkap aaqqissugaanerani aalajangissavaa eqimattakkaatut misilitsinnermi ilinniartut amerlanerpaamik qassit peqataassanersut aammalu ilinniartuq kisimiilluni misilitsinnissamik toqqaasinnaanersooq. Eqimattakkaarluni misilitsinnermi ataasiakkaarlunilu misilitsinnermi ilinniartut saqqummiineri immikkut ataasiakkaatut nalilersorneqassapput aammalu ataasiakkaarlugit karakterilersorneqassallutik.

Imm. 2. Eqimattakkaarluni oqaluttariarsorluni misilitsinnermi ilinniartut ataasiakkaatut misilitsinnerqassapput taamaalluni ilinniartup nammineerluni saqqummiinerata nalilersorneqarnissaa qulakkeerneqarluni. Eqimattakkaarluni oqaluttariarsorluni misilitsinnerup aaqqissuunneqarnerani piffissaq misilitsiffiusussaq ilinniartut misilitsinnermut peqataasut amerlassusaannut naleqquttuunissaa ilinniartup qulakkiissavaa.

Imm. 3. Suliassamut allattariarsorluni akissuteqaammi ilinniartut arlallit suliarisimasaanni ilinniartup ataatsip tunniussaqaarsimanera qularnaarneqarsinnaappat aatsaat immikkut karakterimik tunniussisoqarsinnaavoq imaluunniit allatut nalilerneqarsinnaalluni. Ilinniartup ilinniakkap aaqqissugaanerani inunnut ataasiakkaanut aaqqissuunneqarnissaanut tunngasut aalajangersassavaa.

Imm. 4. Suliassamut allattariarsorluni akissuteqaammut ilinniartunit arlalinnit suliarineqarsimasumut ataasiakkaatut karakterilersuisoqassanngippat imaluunniit allatut naliliisoqassanngippat suliassamut akissuteqaat kingornatigut oqaluttariarsorluni misilitsinnermi nalilersuineri ilaasinnaavoq.

§ 5. Bachelorinngorniartup suliassaq, kandidatinnngorniartup speciali aamma masterinngorniartup suliassaq nalinginnaasumik inuttut ataasiakkaatut suliarineqartarput.

Imm. 2. Bachelorinngorniartup suliassaq, kandidatinnngorniartup speciali aamma masterinngorniartup suliassaq ilinniartut arlallit ataatsimoorlutik suliarisinnaavaat. Ataatsimoorluni suliaqarnermi ilinniartut qanoq amerlatigisut suleqatigiissinnaanersut ilinniakkap aaqqissugaanerani aalajangersarneqassaaq. Inuup ataatsip ilanngussai immikkut nalilersorneqarsinnaassapput.

Imm. 3. Suliaq oqaloqatigiinnermi tunngaviussanersoq ilinniakkap aaqqissugaanerani aalajangerneqarsinnaavoq. Allattariarsorluni suliaq oqaluttariarsorlunilu saqqummiinerup ataatsimut nalilerneqarnerat tunngavigalugu nalilersuisoqassaaq.

§ 6. Oqaluttariarsorluni misilitsinnerit, § 33, imm. 2 malillugu isumaqatigiisummut ilaanngippata tamanut ammasuupput, taamaattorli imm. 2-4 tak.

Imm. 2. Napparsimmavinni napparsimasut peqataaffigisaannik misilitsinnerit napparsimasup akuersineratigut aatsaat tamanut ammasuussapput.

Imm. 3. Ilinniarfiit immikkuullarissunik pissutissaqarpat oqaluttariarsorluni misilitsinnerup tamanut ammasuunnginneranik aalajangersinnaapput, tassunga ilanngullugit ilinniartuq eqqarsaatigalugu tunngavissaqarpat. Taamatuttaaq inissatigut pissutsit pissutigalugit ininut misilitsiffiusunut isersinnaaneq ilinniarfiup killilersinnaavaa aamma misilitsinnermut atatillugu nipaatsumiinnissap toqqissisimanissallu qulakkeernissaannut pisariaqarsorineqarpat inuit ataasiakkaat isernissaannut itigartinneqarsinnaapput aneqquneqarsinnaallutilluunniit.

Imm. 4. Ilinniarfik suliasamat allattariarsorluni akissuteqaammut ilinniartunit arlalinnit suliarineqarsimasumut malitseqartitsilluni aamma eqimattanngorluni oqaluttariarsorluni misilitsinnermut malitseqartitsilluni oqaluttariarsorluni ataasiakkaartillugit misilitsitsippat, ilinniartut taakkua oqaluttariarsorlutik ataasiakkaarlutik suli misilitsissimangikkunik inimi misilitsiffiusumeeqqusaanngillat.

Imm. 5. Oqaluttariarsorluni misilitsinnerup ingerlanerani nipinik assinillu immiussineq inerteqqutaavoq, immiussinerit misilitsinnermut imaluunniit ilinnikkami siunertanut allanut ilaanngippata. Immiussinerit ilinniarfimmit immiunneqassapput.

Imm. 6. Oqaluttariarsorluni misilitsinnermi nalilersuinnermi misilitsitsisoq censorilu taamaallaat najuuteqqusaapput, § 24 tak. Taamaakkaluartuq ilinniarfik siunissami misilitsitsisussat naliliinnermi najuussinnaaneranik aalajangersinnaavoq.

§ 7. Misilitsinneq kalaallisut qallunaatulluunniit ingerlanneqassaaq. Ilinniarfuulli misilitsinnermi oqaatsit taakkunani aappaannai atorineqassasut piumasarisinnaavaa, misilitsitsisoq imaluunniit censorip oqaatsit aappai pisinnaaffiginngippagit.

Imm. 2. Ilinniartup allakkatigut qinnuteqaateqarneratigut oqaatsit aappaasa atorineqarnissaat ilinniarfiup akuersissutigisinnaavaa. Qinnuteqaat ilinniarfiup kingusinnerpaamik piffissaliussaa qaangiutsinnagu ilinniarfimmit tiguneqarsimassaaq. Qinnuteqaat akuerineqanngippat oqaluttariarsorluni misilitsittussaq oqaatsitigut pisariaqartitanik ikiorserneqarnissaanik neqeroorfigineqassaaq, tamanna assersuutigalugu oqaasertaliussanut imaluunniit nassuiaanernut ataasiakkaanut pisinnaavoq.

Imm. 3. Nunat allat oqaasiini ilinniartup pisinnaasaanik takussutissiinissaq misilitsinnermi siunertat ilaginngippassuk ilinniarfinni ilinniartissummiluunniit tuluit oqaasiinik imaluunniit nunat allat oqaasiinik neqerooruteqarfusuni misilitsinnerit oqaatsit neqeroorutigineqartut atorlugit ingerlanneqassapput.

§ 8. Ilinniarfik misilitsinnermut atugassarititanik immikkut ittunik ilinniartunut timimikkut tarnimikkulluunniit piginnaasakitsunut neqerooruteqassaaq, misilitsittussap piginnaasakinnerata kingunerisaanik misilitsittussaq nalinginnaasumik atugassarititaasut atorlugit misilitsissinnaanngippat. Neqeroorutip misilitsinnerup qaffasissusaanik allannguinneginnissaa piumasaqaataavoq.

§ 9. Ilinniarfik video atorlugu ataatsimiinnikkut imaluunniit teknikkikkut allatigut aaqqiinnikkut misilitsitsisinnaavoq. Misilitsinnermut taama ittumut atatillugu isumannaallisaanerit misilitsinnerup ingerlanneqartarneranut nalinginnaasumik atuuttunut naleqquttuunissaat ilinniarfiup qulakkiissavaa. Ilinniarfiup nakkutilliisussat ilinniartup misilitsinnerata nalaani najuuttussat toqqassavai akuerlugilluunniit imaluunniit allatigut misilitsinnerup imminut illersorneqarsinnaasumik ingerlanneqarnissaa qulakkeerlugu. Misilitsitsisoq censorilu ilinniartup sumiiffianniinnatik allamiissinnaapput, taamaattorli malittarisassat nalinginnaasumik atuuttut malillugit misilitsitsissapput naliliilutillu.

§ 10. Ilinniarfik misilitsinnermi peqquserluttoqarnerata misilitsinnermilu akornusersuisoqarnerata kingunerisaanik tullinnguuttunik pineqaatissiisinnaavoq:

- 1) Mianersoqqusineq.
- 2) Soraarummeertussaajunnaarsitsineq.
- 3) Aaqqissuussani ingerlataniluunniit aalajangersimasuni peqataaqqusinnginneq.
- 4) Ilinniarfimiit atuarunnaarsitsigallarneq.
- 5) Ilinniarfimiit atuarunnaarsitsineq.

Imm. 2. Ilinniarfik misilitsinnermi peqquserluttoqarneranut akornusersuisoqarneranullu pineqaatissiisutissat pillugit malittarisassanik erseqqinnerusunik, ilinniarnermi pissusersissaarnissamillu malittarisassani aalajangersaassaaq.

§ 11. Ilinniarfik computerinik atuinnermut aamma ikiutunik allanik kiisalu misilitsinnermi internetimik atuinnermut malittarisassanik ilinniakkap aaqqissugaanerani aalajangersaasinnaavoq.

Nunani allani misilitsinnerit

§ 12. Ilinniartup sulinikkut ilinniartinneqarnera imaluunniit aningaasaqarneq pissutigalugu Kalaallit Nunaanni ilinniarfimi misilitsinnermi peqataasinnaannginnera tunngavilersuutigineqarpat aamma ilinniartoq taassumalu misilitsiffissaa tamatumunnga isumaqataappata, ilinniarfiit qaqutigoortumik kalaallit qallunaalluunniit sinnisoqarfianni nunaniluunniit allani misilitsitsisinnaapput. Nalunaarummi malittarisassat nalinginnaasut malillugit nunani allani misilitsinnerit ingerlanneqassapput. Malittarisassat ilinniarfimiit aalajangersarneqarsimasut malillugit qinnuteqartoqassaaq.

Imm. 2. Ilinniarfik nakkutilliisunik inunnilluunniit allanik nunami allami misilitsinnerup ingerlanneqarnissaanik isumaginnittussanik toqqaassaaq imaluunniit akuersissaaq.

§ 13. Misilitsinnerup nunami allami ingerlanneqarnissaanut atatillugu immikkut ittumik aningaasartuutit ilinniarfiup akilissavai.

Imm. 2. Misilitsinnermut atatillugu aningaasartuutit ilinniarfiup akilersimasai ilinniarfiup ilaannakortumik tamakkiisumilluunniit ilinniartumut akilersissinnaavai. Ilinniartoq aningaasartuutininik pineqartunik akiliisinnaanermik allakkatigut siumut uppersaareersimanissaa piumasaqaataavoq. Misilitsinnerup ingerlanneqarnissaanut aningaasat akilereersimanissaat ilinniarfiup piumasaqaatigisinnaavaa.

Misilitsinnerit amerlassusissaat

§ 14. Misilitsinnerit naliliiffigineqarnerilluunniit allat tamarmik immikkut angusiffigineqassapput. Misilitsinnerit angusiffiusut misilitseqqiffusinnaangillat.

Imm. 2. Ilinniarteq ilinniarfinni misilitsinnermi nalilersuinnermiluunniit allami angusinissaminut pingasoriarluni misiliisinnaavoq. Ilinniarfik pisuni immikkut ittuni misileeqqinnissamut akuersisinnaavoq.

§ 15. Ilinniarteq bachelorinngorniarnermi misilitsinnerit tamaasa angusiffigisimagunigit kandidatinnorniarnermi aatsaat misilitsissinnaavoq.

Imm. 2. Ilinniartitsissutit ukiumoortumik neqeroortigineqarsimanngippata imaluunniit ilinniarnermi ilinniartitsissutit allat ilinniarnernup sivissusaanik sivitsuinnermik kinguneqartitsinngippata ilinniarfik imm. 1-imi malittarisassamik immikkut akuersissuteqarsinnaavoq.

Misilitsinnissamut nalunaarsortarneq

§ 16. Ilinniarteq ilinniartitsissummut imaluunniit ilinniartitsissutip ilaanut ataatsimik arlalinnilluunniit misilitsiffiusassanut nalunaarsorsimaguni misilitsinnissamut imaluunniit misilitsinnissanut ingerlaannartumik nalunaarsorneqartarpoq. Ilinniarfik imm. 3 naapertorlugu immikkut akuersissuteqarsimanngippat, ilinniarteq misilitsinnermi peqataanngippat § 14, imm. 2 naapertorlugu nalunaarsorsimajunnaartoqarsinnaangilaq misilitsinnermillu misiliinertut atortinneqassalluni. Ilinniarfik misilitsinnermut peqataasussaataaermit ilinniakkap aaqqissugaanerani malittarisassanik aalajangersaasimappat, § 3, imm. 3 aamma 4 tak., aamma ilinniartup ilinniakkap aaqqissugaanerani piumasaqaatit aalajangersarsimasut eqquutsinngippagit, misilitsinnermi misiliinertut atortinneqassaaq, § 14, imm. 2 tak., matumani ilinniarfik imm. 3 naapertorlugu immikkut akuersissuteqarsimanngippat.

Imm. 2. Ilinniarfik bachelorinngorniarni suliasamat, kandidatinnorniarni specialimut masterinngorniarnilu suliasamat kingusinnerpaamik tunniussiffissamik aalajangeereersimappat, ilinniarteq tunniussiffissat aalajangiussaq qaangiutsinnagu suliaminik tunniussinngikkuni misilitsittussat nalunaarsoqqajunnaarsinnaangilaq misilitsinnermilu misiliinertut atortinneqassalluni, § 14 imm. 2 tak., matumani ilinniarfik imm. 3 naapertorlugu immikkut akuersissuteqarsimanngippat.

Imm. 3. Ilinniarfik pissutsit immikkut ittut atuutsillugit, tassunga ilanngullugit ernisoqarpat, napparsimasoqarpat, qaniginnerpaasamik napparsimasoqarpat toqusoqarpalluunniit il.il. imm. 1-imi aamma imm. 2-mi malittarisassanik immikkut akuersissuteqarsinnaavoq. Ilinniarfiup ilinniarteq taamatuttaaq ingerlaannartumik misilitsinnissamut nutaamut nalunaarsorsinnaavaa.

§ 17. Ilinniarfinni ukiakkut semesterip naanerani misilitsiffiusartuni ilinniartut misilitsinnermi nalinginnaasumi angusisimanngitsut, misilitsinnissamut piffissaliussap assingani kingunitsianngualuunniit, kingusinnerpaamilli februarimi misilitseqqinnissaannut (misilitsinnerit aappaannut) ingerlaannartumik nalunaarsorneqassapput. Ilinniarfinni upernaakkut semesterip naanerani misilitsiffiusartuni ilinniartut misilitsinnermi nalinginnaasumi angusisimanngitsut, misilitsinnissamut piffissaliussap assingani kingunitsianngualuunniit, kingusinnerpaamilli augustimi misilitseqqinnissaannut (misilitsinnerit aappaannut) ingerlaannartumik nalunaarsorneqassapput. Ilinniarfik imm. 8 naapertorlugu immikkut akuersissuteqarsimanngippat, ilinniarteq misilitsinnermi peqataanngippat § 14, imm. 2 naapertorlugu nalunaarsorsimajunnaartoqarsinnaangilaq misilitsinnermillu misiliinertut atortinneqassalluni

Imm. 2. Ilinniartfinni piffissaliussani imm. 1-imit amerlanerusunik misilitsiffiusartuni ilinniartut misilitsinnermi nalinginnaasumi angusisimanngitsut, piaarnerpaamik kingusinnerpaamilli misilitsinnerup nalinginnaasup kingorna qaammatit arfinillit qaangiunneranni misilitseqqinnissaannut (misilitsinnerit aappaannut) ingerlaannartumik nalunaarsorneqassapput. Ilinniartfik imm. 8 naapertorlugu immikkut akuersissuteqarsimanngippat, ilinniartoq misilitsinnermi peqataanngippat § 14, imm. 2 naapertorlugu nalunaarsorsimajunnaartoqarsinnaanngilaq misilitsinnermillu misiliinertut atortinneqassalluni

Imm. 3. Ilinniartfik § 3, imm 3 aamma 4 naapertorlugit ilinniakkap aaqqissugaanerani piumasaqaatinik aalajangersaasimappat, ilinniartup misilitseqqinnissap aappaa nallertinnagu piumasaqaatit aalajangersarneqarsimasut equutsinnissaannut periarfissaqartinneqassaaq. Ilinniartfiup ilinniartup aappasaanik misilitsinnissaanut piaarnerpaamik nalunaarsussavaa.

Imm. 4. Ilinniartitsissummut nalunaarsornissamut ilinniartitsissutip siuliata naammassisimanissaa angusiffigisimanissaalu piumasaqaataappata (ilikkagassatigut ineriartorneq) ilinniartoq misilitsinnermi siullermi tullermilu angusisimanngitsoq, ilinniartitsissummut piumasaqaataasumut misilitsinnissamut nalinginnaasumut tullermut (misilitsinnerit pingajuat) ingerlaannartumik nalunaarsorneqassaaq. Misilitsinnerit pingajuannit nalunaarsorsimajunnaartoqarsinnaanngilaq, matumani ilinniartfik imm. 8 naapertorlugu immikkut akuersisimanngippat. Ilinniartitsissummi kingusinnerusumi nalinginnaasumik misilitsinnissaq sioqqullugu ilinniartitsissummi pingajussaanik misilitsittoqarnissaa ilinniartfiup qulakkiissavaa.

Imm. 5. Ilinniartoq misilitseqqinnermi imm. 1-imi aamma 2-mi malittarisassat naapertorlugit ingerlanneqartartumi angusinngikkuni misilitseqataanngikkuniluunniit, imm. 3 tak., ilinniartoq misilitsinnermi nalinginnaasumi tullermi peqataanissamut periarfissaqassaaq.

Imm. 6. Misilitseqqinnermi misilitseriaaseq nalilersueriaaserlu misilitsinnermit nalinginnaasumit allaaneruset atorineqassasut ilinniakkap aaqqissugaanerani aalajangersarneqarsinnaapput. Tamannali bachelorinngorniarluni suliassamut, kandidatinngorniarluni specialimut imaluunniit masterinngorniarluni suliassamut atuutinngilaq.

Imm. 7. Ilinniartoq ilinniartitsissummi neqeroorutaajunnaareersumi kingusinnerpaamik qaqugu pingajussaanerluni misilitsissanersoq ilinniakkap aaqqissugaanerani aalajangersarneqarsinnaavoq.

Imm. 8. Ilinniartfik pissutsit immikkut ittut atuutsillugit misilitsinnissamut misilitseqqinnissamullu, imm. 1-4 tak., peqataanissamut ingerlaannartumillu nalunaarsornissamut malittarisassanit immikkut akuersissuteqarsinnaavoq. Ilinniartfiup ilinniartoq taamatuttaaq ingerlaannartumik misilitsinnissamut nutaamut (misilitsinnermut siullermut aappaannulluunniit) nalunaarsorsinnaavaa.

§ 18. Ilinniartfinni misilitsinnerit nalinginnaasumik junimi aamma januarimi pisarput.

Imm. 2. Piffissami nalinginnaasumik misilitsinnerit pisarfisa avataanni misilitsittoqarnissaa, tassunga ilanngullugu napparsimasianerup kingorna misilitsitsinissaq ilinniartfiup akuersissutigisinnaavaa.

Imm. 3. Misilitsinnerup kingorna kingusinnerpaamik ullut sisamat qaangiutsinnagit napparsimalluni misilitsinnissamut qinnuteqaatit tamarmik nakorsap allagartaliussaanik uppersarneqassapput.

Imm. 4. Napparsimalluni misilitsinnissat akuersissutigineqarsinnaapput, misilitsittussaq

- 1) misilitsinnissamut napparsimasutut nalunaarsorsimappat,
- 2) misilitsinnerup ingerlanerani napparsimalerpat,
- 3) napparsimaneq pissutigalugu misilitsinngitsoorpat, imaluunniit
- 4) nammineq napparsimanini pissutigalugu pisorli immikkut ittoq uppersarneqarsinnaasooq pissutigalugu misilitsinngitsoorpat.

Imm. 5. Misilitsittussap misilitsinneq nalunaarsorfigisimasaa nalilersornagu napparsimanermili misilitsinnera nalilersorneqassaaq.

Imm. 6. Misilitsinneq nalinginnaasooq ingerlanneqareernerani napparsimalluni misilitsinnissaa sapinngisamik piaarnerpaamik qaammatillu pingasut qaangiutsinnagit neqeroorutigineqassaaq.

Ilinniakkamik aallussisuunissamut piumasaqaat

§ 19. Ilinniartooq ilinniakkami ingerlaqqinnissamut ilinniarfinni ingerlaavartumik imaluunniit ukiumi ilinniarfiusumi ataatsimi misilitsinnernik ECTS-pointit atorlugit naatsorsorneqartartunik angusisimanissaa (ilinniakkamik ingerlatsinissamut piumasaqaat) pillugu malittarisassanik ilinniarfik ilinniakkat aaqqissugaanerini aalajangersaasinnaavoq. Piumasaqaat misilitsinnernut ukiumi ilinniarfiusuni tamani annerpaamik katillugit 45 ECTS-pointinik pissarsiffiusussanut aalajangersarneqarsinnaavoq. Ilinniarfiup ilinniartooq ilinniartitsissummi imaluunniit ilinniartitsissutip ilaani ilinniakkamik ingerlatsinissamut piumasaqaatini ilaasuni pingasoriarluni misilitsinnissamut, § 14, imm. 2 tak., periarfissaqarnissaa qulakkiissavaa.

Imm. 2. Ilinniarfiup ilinniartooq ilinniartut kattuffianni kajumissutsimik ingerlanneqartumi siulersuisunut ilaasortaappat ilinniakkamik ingerlatsinissamut piumasaqaatip avaqqunneqarnissaa imm. 1 malillugu aamma aalajangersinnaavaa.

Imm. 3. Ilinniartooq timersornermik immikkut piginnaasalittut aallutaqarpat imaluunniit immikkut ittunik pissutissaqarpat, tassunga ilanngullugit sivisuumik napparsimasoqartillugu, erninnermut atatillugu atuannigiffeqartoqartillugu piginnaasakitsoqartillugulu ilinniarfiit ilinniakkamik ingerlatsinissamut piumasaqaammit imm. 1 malillugu aalajangersarneqartumit immikkut akuersisinnaapput.

Misilitsinnermi malittarisassanik ilinniartunut ilisimatitsisarneq

§ 20. Misilitsinnermi malittarisassanik ilinniakkani ataasiakkaani atuuttunik ilinniartumut ilisimatitsisarnissamik ilitseruusissamillu ilinniarfik akisussaasuuvooq.

Misilitsinnermi il.il. kukkunerit amigaatilluunniit

§ 21. Ilinniarfik misilitsinnermut atatillugu imaluunniit misilitsinnerup kingorna kukkunernik amigaatinillu paasisaqaruni, ajornanngippat ilinniarfik misilitsinnermut akisussaasuusumit imaluunniit akisussaasuusunit oqaaseqaammik pissarsereeruni kukkunerup amigaatilluunniit qanoq iluarsineqarsinnaaneranut aalajangiissaaq.

Imm. 2. Kukkunerit imaluunniit amigaatit annertulluinnarpata imaluunniit kukkunerup amigaatilluunniit iluarsineqarnissaannut pissusissamisoortuunerpaamik isumaqarfigineqarpat ilinniarfiup misilitsinneq taamaatiinnarsinnaavaa immikkullu ittumik misilitsinnissamik aaqqissuussilluni.

Imm. 3. Imm. 2-mi taaneqartut saniatigut annertuumik allatigut kukkusoqarsimappat amigaateqarpallu ilinniarfik immikkut ittumik misilitsinnissamik neqeroorsinnaavoq. Taamaassappat ilinniartut misilitsiffigisaat pineqartutut kukkuneqarpat amigaateqarpalluunniit tamarmik neqeroorfigineqassapput. Ilinniartup immikkut ittumik misilitsissimasup nalilersuinerup siulliup atorneqarnissaa aalajangersinnaavaa.

Naliliineq

§ 22. Misilitsinnerit ilinniarfiup iluani avataaniluunniit ingerlanneqarsinnaapput. Ilinniakkap aaqqissugaanerani aalajangersarneqassaaq misilitsinnerit sorliit ilinniarfiup iluani sorliillu avataani ingerlanneqarnersut.

Imm. 2. Ilinniarfiup iluani misilitsinnerit misilitsitsisumit ataatsimit arlalinnilluunniit imaluunniit censori ataaseq arlallilluunniit, ilisimatusarfimmi ilinniartitsisut akornanni ilinniarfiup pisortaanit toqqarneqarsimasut peqatigalugit misilitsitsisumit ataatsimit arlalinnilluunniit nalilersorneqartarput.

Imm. 3. Ilinniarfiup avataani misilitsinnerit misilitsitsisumit ataatsimit arlalinnilluunniit, ilisimatusarfimmi ilinniartitsisut akornanni ilinniarfiup pisortaanit toqqarneqarsimasunit aamma censorimit ataatsimit arlalinnilluunniit ilinniartitaanermut Naalakkersuisoqarfimmit ivertinneqarsimasunit nalilersorneqartarput.

Imm. 4. Ilinniarfiup avataani misilitsinnerit, tassunga ilanngullugit bachelorinngorniarluni suliassaq, kandidatinngorniarluni speciali aamma masterinngorniarluni suliassaq ilinniakkami sammivinnut pingaarutilinnut attuumassuteqassapput. Ilinniakkap katillugit ECTS-pointiisa (European Credit Transfer System) pingajorarterutaat ilinniarfiup avataani misilitsinnikkut uppersarneqassapput. Tamannali misilitsinnernut allami misilitsissimanermi angusanik nuussiffusunut atuutinngilaq, § 31 tak.

Imm. 5. § 3, imm 3, nr. 1 aamma 2 naapertorlugit ilinniartitsinermi peqataanissamut malittarisassanik aalajangersaasoqarsimappat, ilinniartup ilinniartitsinermi peqataanera ilinniartitsinermi pineqartumi ilinniartitsisumit nalilerneqassaaq.

Imm. 6. Ilinniarfiup suliffimmi misiliinermik ilinniarfullu avataani ilisimatusarnernik nalilersuinermit malittarisassat aalajangersassavai.

§ 23. Kinaluunniit ilinniarfimmi ingerlaqqiffusumi ilinniartitsisutut akuerisaq misilitsitsisinnaatitaavoq.

Imm. 2. Ilinniarfiup avataani misilitsitsisumut siunnersortinullu misilitsitsinissamut siunnersuisinnaanermullu pisinnaatitaaffiit pisuni immikkut ittuni nalunaarutigisinnaavai.

§ 24. Censorit misilitsitsisullu nalilersuinerup nalaani saqqummiineq karakteriliinerlu pillugit allattuissapput, taakku naammagittaalliuuteqartoqassagaluarpas naammagittaalliuutip suliarinissaanut atorineqassapput. Allattukkat minnerpaamik ukiumi ataatsimi imaluunniit naammagittaalliuuteqartoqarsimappat taassuma naammassineqarnissaata tungaanut toqqortaatigineqassapput.

§ 25. Misilitseqqinnissamut piginnaatitsisumik napparsimaneq pissutigalugu misilitsinneq taamaatinneqanngippat, misilitsinneq aallartissimappat naliliisoqassaaq, taamaattorli imm. 2 aamma 3 tak.

Imm. 2. Atuarunnaarsitsineq pissutigalugu misilitsinneq taamaatinneqarpat naliliisoqassanngilaq ilinniartorlu misilitsinnermik ataatsimik atuissaaq, § 14, imm. 2 tak.

Imm. 3. Suliassamut allattariarsorluni akissuteqaammi tunniunneqarsimasumi kisermaassilluni suliaqarsimanissamut piumasagaat, § 4, imm. 3 tak. naammassinnittoqarsimanngippat suliassamut akissuteqaat ilinniarfiup itigartitsissutigisinnaavaa. Suliassamut akissut itigartinneqarpat naliliisoqassanngilaq ilinniartorlu misilitsinnermik ataatsimik atuissaaq, § 14, imm. 2 tak.

§ 26. Nalilersuinermi Karakteriliisarnermi tulleriinnilersuineq allatullu naliliisarneq pillugit

Namminersornerullutik Oqartussat nalunaarutaat naapertorlugu GGS-skala malillugu karakteriliisoqassaaq

imaluunniit Angusivoq/angusinngilaq atorlugit naliliisoqassaaq. Ilinniakkap aaqqissugaanerani aalajangersarneqassaaq, misilitsinnerit sorliit GGS-skala atorlugu nalilersorneqassanersut aamma sorliit Angusivoq/Angusinngilaq atorlugit nalilersorneqassanersut. Angusivoq/angusinngilaq atorlugit naliliineq misilitsinnerni ilinniakkap ECTS-pointiisa annerpaamik pingajorarterutaanniittuni atorneqarsinnaapput. Tamannali misilitsinnernut allami misilitsissimanermi angusanik nuussiffiusunut atuutinngilaq, § 31 tak.

Imm. 2. § 3, imm. 3, nr. 1 aamma 2 malillugit ilinniartitsinermi peqataanissamut malittarisassanik aalajangersaasoqarsimappat, ilinniartup ilinniartitsinermi peqataanera Angusivoq/Angusinngilaq atorlugit nalilerneqassaaq.

§ 27. Bachelorinngorniarluni suliamik, kandidatinnorniarluni specialimik, masterinngorniarluni suliamik aamma allattariarsorluni sulianik allanik annertuunik nalilersuineri sammisatigut imarisaata saniatigut ilinniartup allattariarsornikkut oqaasertalersuisarnikkullu piginnaasai pingartinneqassapput. Ilinniartitsissut imaluunniit ilinniartitsissutit oqaatsinut nunalluunniit allat oqaasiinut ilinniartitsissutaanngikkaangata sammisatigut imarisat pigaarnerpaatinneqartarnerat pissutigalugu ilinniakkap aaqqissuunneqarnerani allattariarsornikkut oqaasertalersuisarnikkullu piginnaasat naliliinermut tamarmiusumut qanoq sunniuteqartarnerat pillugu malittarisassat aalajangersarneqassapput.

Imm. 2. Bachelorinngorniarluni suliap, kandidatinnorniarluni specialip aamma masterinngorniarluni suliap eqikkarneri nunat allat oqaasii atorlugit allassimassapput. Bachelorinngorniarluni suliaq, kandidatinnorniarluni speciali imaluunniit masterinngorniarluni suliaq nunat allat oqaasii atorlugit allanneqarsimaguni, eqikkarnera kalaallisut qallunaatulluunniit allanneqarsinnaavoq. Eqikkarnera misilitsilluni saqqummiinerup nalilersorneqarneranut tamarmiusumut ilaatinneqassanersoq eqikkarneralu oqaatsit sorliit atorlugit allanneqarsinnaanersoq allanneqassasorluunniit ilinniakkap aaqqissugaanerani aalajangersarneqassaaq.

Imm. 3. Ilinniarfiup ilinniartut piginnaasakillissimanermut aalajangersimalluinnartumut uppernarsaatillit imm. 1-imit immikkut akuersissuteqarfigisinnaavai, allattariarsornikkut oqaasertalersuisarnikkullu piginnaasat misilitsinnerup siunertaanut annernut ilaangippata.

§ 28. Ilinniarfik suliassanik akissarsiasartalinnik nalunaaruteqartarnermut allanngortitsisarnermullu malittarisassanik ilinniakkap aaqqissugaanerani aalajangersaasinnaavoq.

Imm. 2. Suliassap akissarsiartallip specialinngortinneqarsinnaanera ilinniarfiup ilinniakkamut ataatsimut aalajangersarsinnaavaa. Suliassaq akissarsiartalik gultimik medaaliannassutigineqarsimasoq A-mut karakterinngortinneqarsinnaavoq.

Naliliinermik ilisimatitsisarneq

§ 29. Misilitsinnernut misilitsinnerup kinguinngua naliliinermik nalunaaruteqarfunngitsunut tunngatillugu ilinniarfiup aalajangissavaa, nalilersuineq ilinniartumut ulloq suna nalunaarutigineqarumaanersoq.

Imm. 2. Imm. 1 malillugu ulloq, misilitsinnerup kingorna sapaatit akunneri sisamat iluaniissaaq taannalu misilitsinnissaq pillugu allagarsiilluni allatigulluunniit ilinniartumut ilisimatitsineri ilisimatitsissutigineqassalluni. Sapaatit akunneri taakkua sisamat naatsorsorneqarneranni qaammat juli ilaassanngilaq.

Imm. 3. Bachelorinngorniarluni suliamut, kandidatinnorniarluni specialimut masterinngorniarlunilu suliamut naliliineq suliap specialilluunniit nalilerneqartussanngorlugu tunniunneqarnerata kingorna kingusinnerpaamik sapaatit akunneri arfinillit qaangiutsinnagit nalunaarutigineqassaaq.

Imm. 4. Ilinniartuup immikkut ittumik pissutissaqarpat imm. 1-3-mi piffissaliussaq aalajangiunneqartoq saneqqussinnaavaa. Nalilersuineq ullormut piffissaliunneqarsimasumut piareerneqarsinnaangippat ilinniartuup piaarnerpaamik tamatumunnga pissutaasoq qaqugulu naliliinerup ilisimatitsissutigineqarnissaanut paasissutissat ilinniartumut ilisimatitsissutigissavai.

Soraarummeersimanermut uppersaasat

§ 30. Ilinniartuup ilinniakkap naammassisimaneranut uppersaasuussaq. Uppersaasat misilitsinnerup naammassineqarsimasup nalilerneqarnerata kingorna qaammatit marluk qaangiutsinnagit ilinniakkamik naammassinnittumut nassiunneqarsimassaq tunniunneqarsimassalluniluunniit. Sapaatit akunneri taakkua marluk naatsorsorneqarneranni qaammat juli ilaassanngilaq.

Imm. 2. Uppersaasat kalaallisut danskisullu suliarineqassaq, taamaattorli imm. 4 tak., minnerpaamillu uku allassimassallutik:

- 1) Ilinniakkamik naammassinnittup aqqa inuup normualu kinaassusaanulluunniit uppersaataasinnaasoq naapertuuttoq paatsuugassaanngitsoq alla.
- 2) Ilinniartuup aqqa.
- 3) Taaguut ilinniakkatigit pissarsiarineqartoq kalaallisut, danskisut/latiinerisut tuluttullu allassimasoq.
- 4) Ilinniakkap, tassunga ilanngullugu piareersaataasumik ilinniartitsisoqarsimappat taanna ilanngullugu, ECTS-pointinngorlugu annertussusiligaanera.
- 5) Bacheloritut ilinniagaq allatulluunniit ilinniagaq sorleq kandidatinnngorniartuni ilinniakkamut tunngaviunersoq.
- 6) Ilinniakkami ilinniartitsissutigineqartut misilitsitsiffigineqartullu, allatulluunniit ECTS-pointit annertussusaannik nalunaarsorlugit uppersarneqartut.
- 7) Misilitsinnermi angusat ilinniakkamut allamut nuunneqartut, § 32 tak.
- 8) Soraarummeerneq nunat allat oqaasii atorlugit ingerlanneqarsimappat soraarummeernermi oqaatsit atorineqartut, § 7 tak.
- 9) Nalilersorneqarnikkut angusat, § 26 tak., aammalu ajornanngippat soraarummeerni ataatsimut angusat agguaqatigiisinnerat, Karakteriliisarnermi tulleriinnilersuineq allatullu naliliisarneq pillugit Namminersornerullutik Oqartussat nalunaarutaat takuuk.
- 10) Piginnaasanut allattorsimaffik ilinniakkamik nassuiaasoq.

Imm. 3. Ilinniakkamik naammassinnittoq soraarummeersimanermut uppersaasatip tuluttut suliarineqarnissaanik piunasaqarsinnaavoq.

Imm. 4. Ilinniartuup ilanngussatut Soraarummeersimanermut Uppersaasamut Tapiliussaq tuluttut allassimasoq (Diploma Supplement), Europa-Kommissionip, Europami Siunnersuisoqatigiit aamma UNESCO-p/CEPES-ip iluseq tamanut atugassiaa tunngavigalugu iluseq ineriartortinneqarsimasoq naapertorlugu, ilinniakkap sammivianik, imarisaanik, qaffasissusaanik siunertarisaanillu nassuiaatitalik kiisalu ilinniartuup pillugu aammalu ilinniartuup ilinniakkallu ilinniartitaanerup aqqussuusaanerani inissisimaffia pillugu paasissutissiisoq tunniutissavaa.

Imm. 5. Ilinniakkamut ataatsimut ilisimatusarfinni arlalinni naammassineqartumut uppersaasat ilisimatusarfinnit, ilinniakkap naammassineqarfianit tunniunneqassaq, ilinniartuup akornanni allatut isumaqatigiissuteqartoqarsimanngippat.

Imm. 6. Ilinniartuup ilinniartunut ilinniakkaminnik naammassinninnatik taamaatitsinnartunut ilinniakkap ilaani angusiffigisimasanut uppersaasiissaq.

§ 31. Ilinniartitsissummi imaluunniit ilinniartitsissutini angusiffigisimasani angusat Kalaallit Nunaanni, Danmarkimi nunaniluunniit allani ilinniarfinnit ingerlaqqiffiusunit nuunneqarnissaannik ilinniarfik akuersisimappat nalilersuinerit »Angusivoq« imaluunniit »Angusinngilaq« atorlugit nuunneqassapput. Ilinniarfinni taakkunani marlunni ilinniartitsissutit pineqartut GGS-skala malillugu nalilerneqartarpata nalilersuineq karakterinngorlugu nuunneqassaaq. Ilinniartitsissut imaluunniit ilinniartitsissutip ilaa nunani allani ilinniarfimmi naammassineqarsimappata ilinniarfimmi tassani karakterilersuisarneq sorleq atorlugu anguneqarsimanersut karakterilersuisarnerullu atorneqartup takussutissartaa soraarummeersimanermut uppersaammut ilanngussami allassimassapput.

§ 32. Paasissutissat uppersaasiinermut pisariallit soraarummeereernerup misilitsereernerulluunniit kingorna ukiuni 15-ini ilinniarfiup toqqortaatigissavai. Tamatuma kingorna paasissutissat Nunatta Allagaateqarfanut tunniunneqassapput.

Isumassarsianik piginnittussaatitaaneq

§ 33. Ilinniartup angusanut, pilersitanut assigisaanulluunniit isumassarsiarisaanut misilitsinnermi piulersunut piginnittussaatitaanera ilinniarfiup ataqqissavaa.

Imm. 2. Misilitsinnermi ilinniarfiup avataanit, tassunga ilanngullugit suliffeqarfinnik, pisortat suliffeqarfutaannik il.il. peqataasoqassappat, ilinniarfiup, ilinniartup avataaniillu peqataasussap akunnerminni isumaqatigiissutigissavaat ilinniarfik, ilinniartoq imaluunniit avataaniit peqataasoq isumassarsianik piginnittussaatitaanermi malittarisassat atuuttut ataqqillugit, angusanik, pilersitanik assigisaanulluunniit misilitsinnerup ingerlanerani piulersunik qanoq annertutigisumik atuisinnaatitaanerlutik, tassunga ilanngullugit avataaniit peqataasup pissutsit atugai pillugit paasissutissaqassappat, paasissutissat taakkua tamanut saqqummiuteqqusaanerannut tunngasut.

Kapitali 2

Censorit

Ivertitsisarneq

§ 34. Ilinniarfimmi pisortap censorit siulittaasuat isumasioqatigalugu inassuteqareerneratigut censorit ilinniartitaanermut Naalakkersuisoqarfimmit ivertinneqartarput.

Imm. 2. Ivertinneqarneq ukiunik pingasunik sivisussuseqartumik atuutissaaq. Ivertinneqarnerup kingunerisaanik censori pineqartoq censoreqatigiinnut ivertinneqarsimasunut tamanut ilanngunneqassaaq.

Imm. 3. Naalakkersuisoqarfik pissutsini immikkut ittuni censorinik ataasiarluni censoriusussanik ivertitsisinnaavoq. Censorit iverteqqinneqarsinnaapput.

Imm. 4. Censorinik sapinngisamik amerlanerpaanik ivertitsisoqassaaq, misilitsinnernut tamanut censorit toqqarneqarsinnaasut tamatigut marluusussanngorlugit.

Imm. 5. Ilinniartitaanermut Naalakkersuisoqarfik tassanngaannartumik pisinnaajunnaartoqarnerani imaluunniit assingusumik pisoqarnerani censorimik ivertinneqarsimanngitsumik atuisoqarnissaa imaluunniit atuisoqarsimanera akuerisinnaavaa (immikkut ittumik ivertitsineq).

Imm. 6. Censorip sulinera naammaganngitsutut censorit siulittaasuannit ilinniarfulluunniit pisortaanit isumaqarfigineqarpat, censorit siulittaasuannit imaluunniit ilinniarfimmi pisortamit tunngavilersukkamik

inassuteqartoqarneratigut censorip ivertinneqarnera piffissaliunneqarsimasup qaangiunnissaa sioqqullugu taamaatinneqarsinnaavoq. Ivertitsinerup taamaatinneqarneranut tunngavissaqarneranik Naalakkersuisoqarfiup misissuinerani Naalakkersuisoqarfik censorip ivertinneqarneranik unitsitsigallarsinnaavoq.

Censoreqatigiit

§ 35. Censoreqatigiit imatut katitigaassapput:

- 1) censorit tamarmiusut akornanni ilinniartitsissummi imaluunniit ilinniartitsissutini ilinniakkani ilaasuni imaluunniit ilinniartitsissutini qitiusuni misilitsitsisoqarsinnaassaaq, ilinniakkallu siunnerfigisaanni atorfeqarfinneersuussallutik,
- 2) inunnik ilinniarfiit avataanni atorfeqarfiit ilaanni ilinniakkat siunnerfigisaanni pingaarnertut suliffilinnik peqassaaq,
- 3) censorit arnat angutillu naligiissumik agguataarsimanissaat anguniarneqassaaq, aamma
- 4) ilinniakkani imaluunniit ilinniartitsissutini qitiusuni pisariaqarpat nunani allani ilinniarfinnut attuumassutilinnik censoreqassaaq.

Censorip siulittaasussaannik siulittaasullu tullissaanik toqqaaneq

§ 36. Censoreqatigiit akornanni censorit siulittaasussaannik siulittaasullu tullissaanik, siulittaasup pisinnaannginnerani taartaasussamik Ilinniartitaanermut Naalakkersuisoqarfik toqqaassaaq.

Imm. 2. Censorit siulittaasuat censorinut sinniisuussaaq apequtillu tunngaviusut pillugit censorinik allanik isumaqatigiinniartassalluni.

Imm. 3. Censorit siulittaasuat siulittaasullu tullia sulinerminnut ukiumoortumik akissarsitinneqartassapput. Akissarsiassat annertussusissaat Ilinniartitaanermut Naalakkersuisoqarfimmit aalajangerneqassaaq.

Censorit suliassaasa agguataarneqartarnerat

§ 37. Censorit ivertinneqareerpata censorit allattorsimaffiat Ilinniartitaanermut Naalakkersuisoqarfiup censorit siulittaasuannut assilinalu ilinniarfinnut nassiutissavaa.

Imm. 2. Censorit siulittaasuata ilinniarfiit isumasioqatigereerlugit censoritut suliassat censorinut ataasiakkaanut agguataassavai tamatumunngalu atatillugu allaffissornikkut suliassaalersut isumagalugit.

Censorit

§ 38. Censorisut ivertinneqassagaanni ivertinniarneqartoq:

- 1) ilinniartitsissummi ilisimatuussutsikkut sukumiisumik ullutsinnullu naleqquttumik ilisimasaqassaaq, tassunga ilanngullugit ilinniartitsissummi isumasiuinerit periaatsillu
- 2) ilinniartitsissummi ilinniartitsissutiniluunniit arlalinni sammisanik ilinniakkami imaluunniit qitiusumik ilinniartitsissutigineqartumi immikkut ittumik piginnaasaqassaaq, aamma
- 3) ilinniakkap imaluunniit ilinniartitsissutip qitiusup atornissaanut periarfissat ullutsinnut naleqquttut, tassunga ilanngullugit ilinniarsimasumik pisariaqartitsisup atugai pisariaqartitaalu pillugit ilisimasaqassaaq.

§ 39. Censorit censoriunerminni ilinniarfimmi atorfeqaqqusaanngillat imaluunniit ukiuni kingullerni marlunni ilinniarfimmi atorfeqarsimassanngillat. Ilisimatoq piffissami aalajangersimasumi ilisimatuutut lektoritut ilisimaneqarlutut atassuserneqartoq ilinniarfimmi pineqartup ilisimatuutut imaluunniit lektoritut piffissami aalajangersimasumi atassuserneqarfigisamini censoriusinnaanngilaq. Misilitsitsut censorisut suliaasaat eqqarsaatigalugit suliasaminnik illugiillutik isumaginninnissaat sapinngisamik pinngitsoortinniarneqassaaq (misilitsittumik nalilersueqatigiinneq).

Imm. 2. Censorit atuuffi suliaasaat suliarineqartarnerat pillugu inatsimmi ilaapput, tassunga ilanngullugit suliamut attuumassuteqarneq nipangiussimasussaataanerlu pillugit malittarisassat.

Imm. 3. Censorit siulittaasuiniit imaluunniit ilinniarfiup pisortaaniit inassuteqartoqartillugu ilinniartitaanermut Naalakkersuisoqarfik pissutsit immikkut ittut atuutsillugit imm. 1-imi, oqaaseqatigiinnik siullernik saneqqussisinnaavoq.

Censorit atuuffi

§ 40. Censorisut ivertinneqarnerup kingunerisaanik censori pineqartoq censorisut suliaasanik suliakkerneqaruni censoriunissamut pisinnaatitaavoq pisussaataitaallunilu. Ivertinneqarnermi kapitali 3-mi malittarisassat malillugit nalilersuinerit pillugit naammagittaalliutit suliarineqarnerani peqataanissamut aamma pisussaataaaffik ilaavoq.

Imm. 2. Censorip saqqummiilluni misilitsinnermut aalajangersimaqqissaartumut tunngatillugu illuinnaasiortuunnginnissaata qularinissaanut pissutissaqarpat pineqartoq nalilersueqataasinnaanngilaq tamatuminnгалu censorit siulittaasuannut nalunaartussaataitaalluni.

Imm. 3. Ilinniarfik censorit suliasaminnik suliarinnissinnaanissaannut atortunik qaqugukkulluunniit pisariaqartinneqarsinnaasunik pilersuissaaq.

§ 41. Censorip uku nakkutigissavai:

- 1) ilinniakkami misilitsinnerit imarisassaattut piumasaqaatit anguniakkanut piumasaqaatinullu allanut ilinniakkap aaqqissugaanerani aalajangersarneqarsimasut naapertuuttuunersut,
- 2) malittarisassat atuuttut naapertorlugit misilitsinnerup ingerlanneqarnissaa,
- 3) ilinniartut assigiimmik naapertuilluartumillu pineqarnissaat, aamma
- 4) ilinniartut assigiimmik naapertuilluartumillu pineqarnissaat, saqqummiineri Karakteriliisarnermi tulleriinnilersuineq allatullu naliliisarneq pillugit Namminersornerullutik Oqartussat nalunaarutaanni karakteriliisarnermut malittarisassat, tassunga ilanngullugit ilinniakkap aaqqissuunneqarnerani tamatumunnga tunngatillugu malittarisassat aalajangersarneqarsimasut aammalu ilinniakkamut malittarisassat allat naapertorlugit tatiginartumik nalilerneqarnissaat.

§ 42. Censori:

- 1) ilinniakkap imaluunniit qitiusumik ilinniartitsissutip avataanni misilitsinnernut censoriussaaq, § 22, imm. 3 tak.,
- 2) misilitsittarnerit aaqqissuussaana, matumani misilitseriaaseq imarisaalu aammalu siunertarineqartoq malillugu ilinniakkamilu imaluunniit ilinniartitsissummi qitiusumi ilinniartitsinermilu anguniakkanut naapertuuttumik ingerlanersaq pillugit siunnersuisassaaq,
- 3) piffissap misilitsiffiusup qaangiunnerani misilitsinnerup ingerlanera pillugu ilinniarfimmu censorillu siulittaasuinut nalunaaruteqartassaaq, aamma
- 4) misilitsinnerit pillugit naammagittaalliutinik suliarinneqataasassaaq.

Imm. 2. Censorip pissutsit § 42-imi taaneqartut eqquutsinneqarsimannginneri paasiguniuk imaluunniit censorip ilinniarfiup ilinniakkamik isumaginninnera annertuumik ajornartorsiuteqarsoriguniuk amigaateqarsoriguniulluunniit censori tamanna pillugu ilinniarfimmut assilineralu censorit siulittaasuanut nalunaarutigissavaa.

Kapitali 3

Naammagittaalliornerit

§ 43. Misilitsinnerit imaluunniit nalilersuinerit allat misilitsinnermut ilaasut pillugit naammagittaalliuutit ilinniarfimmut ilinniarfimmut tunniunneqassapput. Naammagittaalliuut allanneqarsimassaaq tunngavilersorneqarsimassallunilu.

Imm. 2. Naammagittaalliuut nalilersorneqarnerup nalunaarutigineqarneranit kingusinnerpaamik sapaatit akunneri sisamat qaangiutsinnagit tunniunneqarsimassaaq. Piffissaliussarli siusinnerpaamik ullormit nalilersorneqarnerup nalunaarutigineqarneranit ilisimatitseeernermit aallartittarpoq, § 29 tak.

Imm. 3. Ilinniarfik immikkut ittumik pisoqartillugu imm. 2-mi naammagittaalliornissamut piffissaliussamit immikkut akuersissuteqarsinnaavoq.

§ 44. Ilaatigut uku naammagittaalliuutigineqarsinnaapput:

- 1) Inatsisitigut apeqqutit (suliaq inatsisit atuuttut tunngavigalugit suliarineqarsimanersoq, tassunga ilanngullugu ingerlatsinnermi inatsisit tunngavissallu malinneqarsimanersut).
- 2) Misilitsinnermi tunngaviusut (apeqqutit, suliassat assigisaalu).
- 3) Misilitsinnerup ingerlanera.
- 4) Nalilersorneqarnek.

Imm. 2. Naammagittaalliuutigineqartoq nalilersuinnermut tunngappat pissutsinulluunniit allanut nalilersuisunut tunngappat, ilinniarfiup naammagittaalliuut nalilersuisimasunut tunniutissavaa, matumani nalilersuisimasoq naammagittaalliummi nalilersuineq il.il. pillugu oqaaseqaateqarnissamut sapaatit akunnerinik marlunnik periarfissaqassalluni. Pissutsit immikkut ittut atuuppata ilinniarfik piffissaliussap sivitsornissaanik aalajangersinnaavoq. Nalilersuinissamut piffissaliussat naatsorsorneqarnerini qaammat juli ilaassanngilaq. Naammagittaalliortoq nalilersuisimasup oqaaseqaataanut sapaatip akunnerata ataatsip iluani oqaaseqaateqarnissamut periarfissaqassaaq.

Imm. 3. Ilinniarfik naammagittaalliummik suliaqarnermut atatillugu misilitsinnerup kukkuneqarneranit amigaateqarneranilluunniit paasisaqaruni § 21-imi malittarisassat atuutissapput.

§ 45. Ilinniarfiup aalajangiinera allakkatigoortoq tunngavilersugaasorlu ukununga tunngassuteqarsinnaavoq:

- 1) nalilersoqqinneqarnissamik neqeroorut (nalilersoqqinneqarnek), oqaluttariarsorlunili misilitsinnerit pinnagit,
- 2) misilitseqqinnissamik neqeroorut (misilitseqqinneq), imaluunniit
- 3) naammagittaalliuuteqartup ilalerneqannginnera.

Imm. 2. Ilinniarfiup naammagittaalliuuteqartoq nalilersuisimasullu aalajangiineq pillugu piaartumik nalunaarfigissavai. Aalajangiineq nalilersoqqinneqarnissamut imaluunniit misilitseqqinnissamut tunngassuteqarpat nalilersoqqinneqarnek imaluunniit misilitseqqinneq appasinnerusumik

karakteerilernerneqarnermik kinguneqarsinnaasoq naammagittaalliuuteqartumut ilisimatitsissutigineqassaaq.

§ 46. Ilinniarfiup aalajangiinera naammagittaalliuuteqartumut nalunaarutigineqareernerata kingorna kingusinnerpaamik sapaatit akunneri marluk qaangiutsinnagit naammagittaalliuuteqartup nalilersoqqinneqarnissamik imaluunniit misilitseqqinnissamik neqeroorut akuerissavaa. Sapingisamik piaarnerpaamik nalilersueqqittoqassaaq imaluunniit misilitseqqittoqassaaq. Soraarummeersimanermut uppersaasiisoqareersimappat, § 31 tak., nalilersuisoqareernissaata tungaanut ilinniarfiup uppersaasat atussavaa kingornalu pisariaqarpat nutaamik uppersaasiissalluni.

Imm. 2. Nalilersueqqinnermi misilitseqqinnermilu misilitsitsisussat nutaat ilinniarfimmit aamma pisariaqarpat censorit nutaat censorit siulittaasuannit imaluunniit ilinniarfiup pisortaanit toqqarneqassapput.

Imm. 3. Nalilersueqqinnermi nalilersuisussat suliami allagaatit, tassunga ilanngullugit suliaq, akissut, naammagittaalliuut, nalilersuisut oqaaseqaataat siulleg, naammagittaalliuuteqartup oqaaseqaatai aamma ilinniarfiup aalajangiinera saqqummiutissavaat.

Imm. 4. Nalilersueqqinnermi misilitseqqinnermilu nalilersuineq appasinnerusumik karakteereqalernermik kinguneqarsinnaasoq nalilersuisunit ilinniarfimmut nalunaarutigineqassaaq. Nalilersuisut allattariarsorluni misilitsinnermik nalilersuinnermi nalilersuinnermut allakkatigit tunngavilersuutertik ilanngutissavaat. Nalilersoqqinneqarnerup misilitseqqinnerullu kingorna nalilersuineq allaffissornikkut oqartussaasumut allamut ingerlateqqinneqarsinnaanngilaq.

§ 47. Ilinniarfiup naammagittaalliummut aalajangiinera ilinniartup inatsisitigit inissisimaneranut tunngasoq ilinniartitaanermut Naalakkersuisoqarfimmut saqqummiunneqarsinnaavoq.

Imm. 2. Naammagittaalliummut aalajangiinnermi ilinniartup inatsisitigit inissisimaneranut tunngasumi § 44, imm. 1-imi, nr. 1-3 pissutsinut taaneqartunut aalajangiinnerit ilaapput.

Imm. 3. Ullormiit aalajangiinnerup naammagittaalliuuteqartumut nalunaarutigineqarneraniit sapaatit akunneri sisamat iluanni naammagittaalliuutip tunniunneqarsimanissaa piffissaliunneqarpoq.

Imm. 4. Ilinniarfiup naammagittaalliuutinut aalajangiinneri ilinniartup inatsisitigit inissisimaneranut tunngassuteqanngitsut, misilitsinnermi naliliinerit pillugit naammagittaalliuutit ilanngullugit allaffissornikkut oqartussanut qulliunerusunut ingerlateqqinneqarsinnaanngillat.

§ 48. Ilinniarfiup naalakkersuisoqarfullu naammagittaalliummik suliamik suliarinninneranni ilinniartup ilinniakkani ingerlatiinnarsinnaavaa.

Kapitali 4

Misileraalluni inerisaallunilu suliat

§ 49. Ilinniartitaanermut Naalakkersuisoqarfik immikkut pisoqartillugu inatsimmik sanioqqutsinnaavoq, tamanna misileraalluni sulinissap perorsaanikkullu inerisaanissap siuarsarnissaannik peqquteqarpat. Misileraalluni inerisaallunilu suliat ilinniartut ilinniakkaminnik inuussutissarsiummut ilinniakkamut, ingerlaqqiffiusumik ilinniakkamut akuerineqarnissamut periarfissaannik allatigulluunniit pisinnaatitaaffinik ajornerulersitsinnginnissaat piumasaqaataavoq.

Imm. 2. Imm. 1 malillugu inatsimmik sanioqqutsisoqarpat, misileraalluni perorsaanikkulluunniit inerisaanermik suliat sivilissusissaat taakkunungalu nalunaarusioriaaseq ilutigisaanik aalajangersarneqassapput.

Imm. 3. Ilinniartitaanermut Naalakkersuisoqarfik immikkorluinnaq ittunik pisoqartillugu ilinniartunut ataasiakkaanut tunngatillugu inatsimmik sanioqqutsisinnaapput.

Kapitali 5

Atortuulersitsineq

§ 50. Nalunaarut ulloq 1. august 2024-mi atuutilissaaq. Taamaattoq nalunaarummi pisussaaffittut aalajangersarneqarsimasut aallaavigalugit ilinniartitaanermi aaqqissuussinerit kingusinnerpaamik 1. marts 2024 pereersimasussaagalarput 1. august 2024-milu atuutsilersinneqarsimasussaagalarlutik.

Imm. 2. Tamatuma ilutigisaanik Ilisimatusarfimmi ilinniagaqarnerit soraarummeertarnerillu pillugit Namminersornerullutik Oqartussat nalunaarutaat nr. 27, 1. september 1995-imeersoq, Ilisimatusarfimmi nalileeqataasoqartarnissaa pillugu Namminersornerullutik Oqartussat nalunaarutaat nr. 6, 2. januar 1990-imeersoq kiisalu Ilinniartissuarmi ilinniaqqinneq il.il. pillugu Namminersornerullutik Oqartussat nalunaarutaat nr. 23, ulloq 8. juli 1991-imeersoq atorunnaarsinneqassapput.

Namminersorlutik Oqartussat, ulloq 8. januar 2024

Aqqaluaq B. Egede (atsior.)

Meeqqanut, Inuusuttunut, Ilinniartitaanermut, Kultureqarnermut, Timersornermut, Ilageeqarnermullu Naalakkersuisoq

/ Nuka Kleemann (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

